

每週經課朗誦經文(巴克禮漢羅/教羅)2013/10/06

共同經課 - 1 耶利米哀歌一章一節~六節

1 Ai ah! chit-ê 城從前百姓滿滿, taⁿ 怎樣孤單 teh 坐! 從前 tī 列國中做大 ê, taⁿ 竟然親像寡婦; 從前 tī chiah-ê 省中尊伊做王后 ê, Taⁿ 成做進貢 ê) 2 伊暝間大啼哭, 目屎流到滿面; Tī 一切親愛 ê 人 ê 中間無一個安慰伊; 伊 ê 朋友 lóng 用詭詐款待伊, In 成做伊 ê 對敵。3 猶大因爲 tú-tiòh 苦難, koh 因爲受 tiòh choē-choē 勞苦, 就遷徙到外邦; 伊 tiàm tī 異邦中無 thang chhē-tiòh 安歇; 追 jip 伊 ê tī 狹狹 ê 所在 lóng jip-tiòh 伊。4 錫安 ê 路徑悲傷, 因爲無人赴伊 ê 節期; 伊 ê 城門 lóng 冷靜, 伊 ê 祭司吐氣; 伊 ê 在室女艱難, 伊本身也憂苦。5 伊 ê 對敵做頭, 伊 ê 仇讎興通; 因爲耶和華爲 tiòh 伊 choē-choē 悖逆, hō 伊受苦; 伊 ê gín-ná hō 對敵掠去。6 錫安 ê cha-bó-kiáⁿ, 伊 ê súi 一盡無去; 伊 ê 貴族親像 chhē 無草場 ê 鹿。 In 無氣力, 受趕 tī 追 jip ê 人 ê 面前。

共同經課 - 2 詩篇一百三十七篇

1 阮 bat 坐 tī 巴比倫 ê 河邊, 一下想 tiòh 錫安, 目屎就流。2 阮將阮 ê 琴, 吊 tī hit 位 ê 柳樹。3 因爲 tī-hia 掠阮 ê, ài 阮唱歌, 搶阮 ê ài 阮快樂, 講, Lín tiòh kā 阮唱一首錫安 ê 歌。4 阮 tī 外邦, Thài-thó oē 唱耶和華 ê 歌? 5 耶路撒冷 ah, 我若 boē 記得你, 願我 ê chiáⁿ 手失落伊 ê 本事。6 我若 boē 記得你, 若無看耶路撒冷 khah 過頭 tī 我所第一歡喜 ê, 願我 ê 舌連 tī 我 ê chhiūⁿ-kiuⁿ。7 耶路撒冷 tú-tiòh 患難 ê 時, Í-tong 人講, 拆毀伊, 拆毀伊, 直直拆到地基; 耶和華 ah, 求你記得 hit 日。8 Teh-beh 受滅 ê 巴比倫城 ah, 報應你親像你款待阮 ê, Hit 號人有福氣。9 掠你 ê 嬰 á, siak tī 石磬 ê, Hit 號人有福氣。

共同經課 - 3 提摩太後書一章一節~十四節

1 Tùi 上帝 ê 旨意, 照 tī 基督耶穌活命 ê 應允, 做基督耶穌 ê 使徒保羅, 2 phoe 寄 hō 我所疼 ê kiáⁿ 提摩太; 願你 tùi 父上帝 kap 咱 ê 主基督耶穌得 tiòh 恩典、憐憫、平安。3 我感謝上帝, 就是我續接列祖, 用清氣 ê 良心所服事 ê, tī 祈禱 ê 時我 siàu 念你無 soah, 4 記得你 ê 流目屎, 暝日欣慕見 tiòh 你, hō 我滿心歡喜; 5 念 tiòh 你心內無假 ê 信, chit-ê 信是事先 tiàm-tī 你 ê 外媽 Lô-í, kap 你 ê 老母 Iú-nî-ki, 我深信 chit-ê 信也是 tiàm-tī 你。6 爲 tiòh chit-ê 緣故我點醒你, ài 你將上帝 tùi 我 ê 接手所 hō 你 ê 恩賜 koh 奮志, 親像 hō 火 koh 燄一樣。7 因爲上帝所賞賜咱 ê, m̄ 是驚惶 ê 心神, 就是權能、仁愛、守己 ê 心神。8 所以 kā 咱 ê 主做干證, 莫得掠做見笑, 也莫得掠我做主 ê 囚犯來見笑; tiòh 照上帝 ê 權能爲 tiòh 福音 saⁿ-kap 受苦; 9 伊救咱, 用聖 ê 召召咱, m̄ 是照咱 ê 行做, 是照伊家己 ê 旨意 kap 恩典, chit-ê 恩典就是永世代 ê 事先 tī 基督耶穌賞賜咱 ê, 10 但是現今對咱 ê 救主基督耶穌 ê 顯現來表明 ê。伊已經廢無死, koh tùi 福音 hō 活命 kap boē 敗壞 ê lóng 顯明; 11 我爲 tiòh chit-ê 受設立做宣傳 ê, 做使徒, 做教師。12 爲 tiòh chit-ê 緣故我也受 chiah-ê 艱苦; 但是我無掠做見笑; 因爲我 bat 我所信 ê, 也深信伊會保守我所交託伊 ê, 到 tī hit 日。13 你 tùi 我所聽見 hiah-ê 端正 ê 話 ê 模樣, tiòh 用 tī 基督耶穌 ê 信 kap 仁愛來執守伊。14 所交託你 ê 好事, 你 tiòh oá 靠 tiàm-tī 咱 ê 聖神來顧守伊。

共同經課 - 4 路加福音十七章五節~十節

5 使徒 kā 主講, 加添阮 ê 信。6 主講, Lín 若有信親像一粒 ê 芥菜子, 就命令 chit 叢桑 chài 樹講, 拔你 ê 根去栽 tī 海裡, 伊也 beh 順 thàn 你。7 Lín 中間甚麼人有奴僕 teh 作園 á 是顧羊, tùi 園裡 tò 來, kiám beh kā 伊講, 即時坐來食 mah? 8 Kiám 無 beh kā 伊講, 備辦 hō 我食, há 帶來服事我; thèng 候我 lim 食 soah, 你 chiah thang lim 食 mah? 9 奴僕行所命令 ê, kiám 有 kā 伊說謝 mah? 10 Án-ni, lín 已經一盡行所命令 lín ê, 就 tiòh 講, 阮是無利益 ê 奴僕, 行所應該行 ê nā-tiāⁿ。